

**KANTONALNA
PRIVREDNA
KOMORA TUZLA**

**BROJ 1 i 2/16,
januar/februar
2016. godine**



KOMORSKI INFORMATOR



**„RAZVOJNI PRAVCI
PRIVREDE TUZLANSKOG
KANTONA 2016. GODINI“**



**ODRŽANE SJEDNICE UO I
SKUPŠTINE KOMORE**



**PRIJEM ZA AMBASADORICU
CORMACK U KOMORI I RAZGO-
VOR SA PRIVREDNICIMA TK**



**KANTONALNI MINISTRI SU
UPRILIČILI POSJETE PRED-
SJEDNIKU KANTONALNE
PRIVREDE KOMORE TUZLA**

Komorski informator

Uvod

Poštovani čitaoci!



Nekako su, kao po pravilu, januar i februar donosili manje aktivnosti, predstavljali period svođenja računa, pravljenja planova i zagrijavanja za ono što godina donosi. No, pravila su tu da bi se kršila. Upravo prva dva mjeseca 2016. godine, bar kada je u pitanju Kantonalna privredna komora Tuzla, izlaze iz uobičajenih okvira. Zabilježeno je niz aktivnosti, skoro za duplo veći broj stranica Komorskog informatora. Kako je dvobroj postao standard u ovim teškim i neizvjesnim vremenima, poglavito kada je riječ o finansijama, morala se napraviti selekcija i izdvojiti najvažnije.

Svakako da se tu ubraja organizovanje tematske sjednice Upravnog odbora Kantonalne privredne komore Tuzla u proširenom sazivu i Vlade Tuzlanskog kantona, na temu „Razvojni pravci privrede Tuzlanskog kantona u 2016. godini“. Dobra organizacija, dobar odziv, doneseni zaključci za koje se očekuje da će biti realizovani u narednom periodu.

Ništa manje značajne nisu bili aktivnosti komorskih tijela. Održane su redovne sjednice UO i Skupštine, usvojeni Program rada i Finansijski plan za 2016. godinu. Održani su i poslovni susreti sa predstavnicima slovenačkih firmi.

A kako u rubriku “najvažniji”, ne svrstati posjetu uvažene gošće, Njene Ekselencije Maureen E. Cormack ambasadorice Sjedinjenih Američkih Država u BiH. Pohodila je Tuzlu, upriličila niz posjeta, sve u povodu obilježavanja Dana dr Martina Lutera Kinga, e onda je neizbježna posjeta Komori, susret sa odabranim privrednicima i razgovor o mogućnostima privredne saradnje, kad je već tu.

Da Vlada Tuzlanskog kantona zaista u Komori vidi značajnog partnera na duge staze, pored prisustva njenih predstavnika na gore navedenim aktivnostima u Komori, dokaz je i posjeta uvaženih kantonalnih ministara predsjedniku Komore. U službenu posjetu, koja je doduše izmakla pažnji medija, predsjedniku Kikanoviću stigli su Mirsad Gluhic ministar za trgovinu, turizam i saobraćaj, Srđan Mićanović ministar za industriju, energetiku i rudarstvo i obavezno Nermin Hodžić ministar za razvoj i poduzetništvo. Bilo je na sastancima razmjene informacija, dogovora, zaključaka, a rezultati sigurno neće izostati.

Komora se iz dana u dan potvrđuje kao snažan servis privredi. Potvrda tome je, uz značajnu poziciju Komore kod Vlade TK, u brojnim uslugama koje se nude privrednicima. A ovi to s druge strane prepoznaju, pa ne čudi što mi je i u ovom uvodniku pripala čast i zadovoljstvo napisati da smo dočekali nove članice komore, nove firme koje su pristupile brojnom i zadovoljnom članstvu. Ne bi bilo dobro da je sve pohvalno, uljaljkalo bi nas i uspavalo, pa treba pomenuti da je bilo i sastanaka na kojima se izrazilo nezadovoljstvo nepružanjem podrške u podnošenju određene inicijative, konkretno, u oblasti trgovine i turizma. Dobro, treba kritike prihvatiti i dati svoj maksimum da se promijene stavovi nezadovoljnih.

Pišemo u ovom broju i o Rudnicima mrkog uglja Banovići, novostima iz firmi “Nipex”, “Piemonte”, “Solana”, Rudnik “Tušanj”, “Dita”, “MAT”, “Borplastika”.

Ne možemo i nećemo bez sajamskih aktivnosti pa vrijedi pomenuti da nas u narednom periodu, pored sajma “Viroexpo” u Virovitici na kojem smo u vrijeme štampanja ove novine, očekuju značajne sajamske manifestacije: 34. međunarodni sajam šumarstva, drveta, namještaja i unutrašnjeg uređenja – INTERIO i 3. međunarodni sajam pejzažne arhitekture i hortikulture – EXTERIO, 14. sajam turizma “List” Lukavac, 19. međunarodnom sajmu gospodarstva MOSTAR, Međunarodni sajam energetike ENERGA u Tuzli. Ne znam na kojem ćemo učestvovati od pomenutih, ali ne škodi, najaviti ih...

Dino Kalesić
gl. i odg. urednik



Komorski informator Sadržaj

KANTONALNA PRIVREDNA KOMORA TUZLA

**KOMORSKI INFORMATOR
BROJ 1 i 2/16,**
januar/februar
2015. godine

IZDAVAČKI SAVJET:

1. Nedret Kikanović, član
2. Mirsad Kukić, član
3. Bajazit Jašarević, član
4. Suad Selimović, član
5. Nurudin Žunić

REDAKCIJSKI KOLEGIJ:

1. Nedret Kikanović, član
2. Esad Arnautović, član
3. Nurudin Žunić, član
4. Suad Selimović, član

IZDAVAČ:

Kantonalna privredna
komora Tuzla

GL. I ODGOVORNI UREDNIK:

Dino Kalesić

**TEHNIČKA PRIPREMA,
REPRO I ŠTAMPA:**

GRIN d.o.o. Gračanica

ZA ŠTAMPARIJU:

Adnan Imerović, direktor

TIRAŽ:

500 primjeraka.

ADRESA:

Trg slobode bb
e-mail: kpktz.ba@bih.net.ba
<http://www.kpktz.ba>

	„RAZVOJNI PRAVCI PRIVREDE TUZLANSKOG KANTONA U 2016. GODINI“	4 i 5
	ODRŽANE SJEDNICE UO I SKUPŠTINE KOMORE	6
	ODRŽANI POSLOVNI SUSRETI SA SLOVENAČKIM FIRMAMA	6
	PRIJEM U KOMORI I RAZGOVOR SA PRIVREDNICIMA TK	7
	KANTONALNI MINISTRI SU UPRILOŽILI POSJETE PREDSJEDNIKU KANTONALNE PRIVREDE KOMORE TUZLA	8
	PONOVO UKAZANO NA NEPRAVILNOSTI U OBLASTI TURIZMA	9
	POVEĆAN BROJ ČLANICA KOMORE	10
	PREDSJEDNIK FBiH MARINKO ČAVARA POSJETIO OPĆINU I RMU “BANOVIĆI”	11
	STANICA ZA TEHNIČKI PREGLED VOZILA	12
	OBILJEŽENO USPJEŠNO POSLOVANJE U “PIEMONTU” TUZLA	13
	“SOLANA” TUZLA POVEĆALA PROIZVODNJU I IZVOZ - DRŽAVA UVOZI SO	14
	RUDNIK SOLI TUŠANJ: ZABILJEŽENA REKORDNA PROIZVODNJA	15
	PROIZVODE NOVIH 100 TONA ARIXA	16



Tematska sjednica u Komori....

“Razvojni pravci privrede TK u 2016. godini”

Kantonalna privredna komora Tuzla organizovala je zajedničku tematsku sjednicu Upravnog odbora Kantonalne privredne komore Tuzla u proširenom sazivu i Vlade Tuzlanskog kantona, na temu „Razvojni pravci privrede Tuzlanskog kantona u 2016. godini“.



Sastanak koji je otvorio Izet Džananović direktor Termoelektrane Tuzla, inače, dopredsjednik UO Komore, bio je prva u nizu zajedničkih aktivnosti Vlade TK i privrednika okupljenih u Komori. Sve sa ciljem da se na području Tuzlanskog kantona pokušaju integrisati svi raspoloživi resursi za realizaciju, kako kapitalnih investicionih projekata, tako i projekata koji su veoma važni za ovo područje ali nisu okarakterisani kao jedan od globalnih dugoročnih ciljeva. “Bio je ovo kvalitetan i uspješan pokušaj da se na jednom mjestu prezentiraju potencijali investitora, prije svih, Vlade TK i dijela privrednih društava koja su usvojila investicione planove. Riječ je o planovima koji bi mogli biti u funkciji zapošljavanja, e posebno industrijskih i uslužnih djelatnosti na području Tuzlanskog kantona”, izjavio je direktor Džananović. Dodao je kako se brzih dana može očekivati naredni sastanak na kojem će biti prezentovani konkretni projekti, prije svega iz energetskog sektora, rudarskog i termoelektranskog. “Više je ciljeva kojima vode ove aktivnosti. Pokušat će se obezbijediti potencijali kojima bi se raspoloživa sredstva zadržala na području Tuzlanskog kantona, e što bi obezbijedilo veći procenat zapošljavanja, razvoj domaće uslužne djelatnosti. S druge strane, da se pokuša kreirati samoodrživi ambijent koji je bitan za značajne privredne subjekte koji egzistiraju na ovom području, prije svega na termoelektrane i rudarske kapacitete koji se susreću sa problemom nerazvijenosti tržišta u oblasti pružanja neophodnih usluga”, izjavio je Izet Džananović dopredsjednik UO Komore.



Iznesen je stav kako je domaći potencijal veoma značajan i u potpunosti dovoljan za samoodrživost. Također, kao smetnja tome, istaknut je problem organizacije tržišta, e na čemu treba da porade privredna udruženja i asocijacije kao što su Udruženje

poslodavaca i privredna komora. Suštinski je važno, istakao je direktor Džananović, da se raspoloživi finansijski kapaciteti i potencijali pokušaju zadržati u najvećem mogućem obimu, prije svega za očuvanje i razvoj domaće privrede.

I Nermin Hodžić, ministar za razvoj i poduzetništvo je istakao zadovoljstvo organizovanjem zajedničkog sastanka predstavnika Vlade i privrednika. “Ovaj sastanak predstavlja konkretan iskorak Vlade TK prema privrednicima i generalno privredi na području Kantona. Želja nam je da naše aktivnosti planirane za ovu godinu provodimo u neophodnoj koordinaciji sa privrednim sektorom. Iskoristili smo ovaj sastanak i za prikupljanje dodatnih informacija od privrednika, bankarskog sektora, e vezanim za dalje vidove saradnje”, rekao je ministar Hodžić. Kako je naglasio, u Budžetu za 2016. godinu su predviđena kapitalna ulaganja koja obuhvataju više značajnih sektora društva, između ostalog, i za zapošljavanje kategorija koje se teško zapošljavaju. Istaknuto je da će veliki značaj za segment zapošljavanja imati i sredstva koja je za Tuzlanski kanton odobrila Vlada FBiH a u iznosu od oko 14 miliona KM.



Kantonalna privredna komora Tuzla je putem granskih udruženja u stalnom kontaktu sa privrednicima na području Tuzlanskog kantona. Prikupljaju se informacije koje govore kako privrednici očekuju veće pogodnosti, više ulaganja u privredu. “Upravo na iskazanu potrebu i želju naših privrednika smo organizovali ovakav skup kako bi se privrednicima prezentovalo to što Vlada TK planira za 2016. godinu u oblasti razvoja privrede. Smatram da će prezentovani projekti, predviđena sredstva u Budžetu vlada TK i FBiH, rezultirati novim radnim mjestima i povećanjem industrijske proizvodnje na području Kantona”, izjavio je Nedret Kikanović predsjednik Kantonalne privredne komore Tuzla. Zahvalio se, na kraju, predsjednik Kikanović članovima Vlade TK i UO Komore Tuzla, na odlučnosti da se na jednom ovakvom skupu, kakav je bio ovaj u Komori, u direktnom kontaktu sa privrednicima razgovara o razvojnim pravcima privrede Tuzlanskog kantona u 2016. godini. Predstavljeni su na ovom skupu proizvod Komore pod nazivom “Tuzlanski kanton - vaš poslovni partner”, te informacija o privrednim kretanjima na području Tuzlanskog kantona za period januar - oktobar 2015. godine.

Pripremio: Dino Kalesić



Epilog zajedničke sjednice...

Zaključci sa sastanka u Komori

Zajednička tematska sjednica Upravnog odbora Kantonalne privredne komore Tuzla u proširenom sazivu i Vlade Tuzlanskog kantona održana u Kantonalnoj privrednoj komori Tuzla, polučila je određene usaglašene zaključke. Podsjetimo, diskusiji i zaključcima su prethodila obraćanja kantonalnih ministara. Jakub Suljkanović ministar za finansije i Srdan Mićanović ministar za industriju, energetiku i rudarstvo su pozdravili skup nakon čega je uslijedila prezentacija „Razvojni pravci privrede Tuzlanskog kantona u 2016. godini Nermina Hodžića ministra za razvoj i poduzetništvo. E nakon prezentacija uslijedila je diskusija koja je polučila zaključke za koje će se očekuje da će biti realizovani u narednom periodu.



Zaključci sa zajedničke sjednice:

Potrebno je da Vlada Tuzlanskog kantona pomogne oko zakonskih uređenja, da razmotre mogućnosti kako banke mogu kreditirati poljoprivredu jer ne postoji jedinstven registar poljoprivrede, ne postoji jedinstven obrazac, kako bi banke mogle da izmire tu finansijsku snagu, finansijsku polugu, jer zakoni nisu decidni i jasni na opštinskom nivou. Ova populacija nema pristupa finansijama, sve se rješava preko mikrokreditnih organizacija. Treba iznaći rješenje prvo registracije poljoprivrednika, a zatim napraviti normative po kojima bi bankari radili. U ovo treba uključiti osobe sa poljoprivrednih fakulteta koji tačno znaju koji su prinosi u poljoprivredi.

Jedna od tema na okruglim stolovima u narednom periodu treba da bude raslojavanje malih privatnih firmi jer su i one nepoželjne za razliku od javnih institucija

Na području Tuzlanskog kantona postoje pleminarne zone koje treba podržati, odnosno u budžetu treba uraditi subvenciju kamata, a ne kreditirati ih jer je to posao banaka. Subvencioniranje kamata treba da bude kao nagrada za dobro urađen posao, gdje bi banke preko kojih se radio kredit dale izvještaj da li se kredit uložio kako treba, da li se izvršilo zapošljavanje, kakvi su finansijski pokazatelji itd.; Da Vlada Tuzlanskog kantona i resorna ministarstva pozovu banke kako bi se konsultovali prije nego što se urade određeni programi koji imaju ekonomskog interesa za širu zajednicu gdje je potrebna finansijska podrška, jer banke imaju prijedloge kako da pomognu da ovaj segment dođe do finansija, a da banke budu legalne;

Da Vlada Tuzlanskog kantona pomogne poljoprivrednicima oko dokazivanja čistog granta, jer se ne može uspostaviti hipoteka na nešto što nije dokazano;

Da Komora organizuje okrugli sto na temu „Status savremenog poljoprivrednika“;

Da Komora u kratkom roku po resornim udruženjima organizuje tematske razgovore (rasprave) na ovu temu kako bi se pokušalo integrisati ove potencijale koje imamo;

U Komori se priprema i dogovora sastanak vezano za planove i programe ulaganja u rudarski i energetski sektor u narednom periodu i da se sektor metalne i elektroindustrije uključe kako bi mogli pružiti određene usluge da se napravi jedna kohezija, da zajednički krenu prema investicijama koje će se dešavati u rudarskom i energetskom sektoru, jer je ovo šansa i perspektiva za sve;

U Komori se priprema projekat „Domaći privrednik“ u smislu da firme članice komore jedni drugima daju bonitete, da jedni od drugih kupuju i troše ono što proizvode;

Komora će sa Vladom Tuzlanskog kantona nastaviti zajedničku promociju domaćih proizvoda;

Komora stoji na raspolaganju Vladi Tuzlanskog kantona i resornim ministarstvima vezano za registar preduzeća koji Komora već ima uspostavljen;

Komora stoji i na raspolaganju vezano za registar poljoprivrednih obrta i gazdinstava vezano za servisiranje i vođenje i da pruži šansu da poljoprivrednici imaju otvorena vrata kod banaka, a ne da samo preko mikrokreditnih organizacija. Komora može biti na usluzi da servisiraju ovaj registar koji se nalazi u ministarstvu i Vladi Tuzlanskog kantona.



Aktivnosti komorskih tijela...

Održane Sjednice UO i Skupštine Komore



Na redovnim sjednicama Upravnog odbora i Skupštine Komore, članovi ovih komorskih tijela su razmatrali nacрте, odnosno prijedloge Programa rada i Finansijskog plana Komore za 2016. godinu. Upravni odbor Komore jednoglasno je, uz nekoliko primjedbi tehničke prorode, usvojio Nacrt Programa rada, Nacrt Finansijskog plana i poslao dokumente Skupštini na usvajanje.

Razgovarali su članovi UO Komore i o tekstu Nacrta zakona o Privrednoj komori Tuzlanskog kantona. Zaključeno je da se o toj temi još razgovara, da se preispitaju određeni dijelovi teksta, upozna Skupština Komore sa inicijativom, organizuje eventualno rasprava i tematska sjednica UO Komore. I članovi Skupštine Komore jednoglasno su usvojila Prijedlog Programa rada Komore za 2016. godinu uz određene zaključke i dopune koje se uglavnom odnose na neophodnost kvalitetnije saradnje Komore i Vlade TK. Sve s ciljem stvaranja povoljnijeg poslovnog okruženja na području Tuzlanskog kantona. Skupština Komore jednoglasno je usvojila Prijedlog Finansijskog plana Kantonalne privredne komore Tuzla za 2016.godinu. Na dnevnom redu su bila i kadrovska pitanja. Dosadašnje predsjednika Skupštine Komore Envera Omazića na toj funkciji će zamijeniti Osman Bleković v.d. direktor JP Elektroprivreda BiH d.d. Sarajevo – ZD Rudnici „Kreka“ d.o.o. Tuzla a Hašim Šabanović iz firme „Gradačački sajam“ doo Gradačac je novi član Skupštine na mjestu Huseina Topčagića.

Poslovni skup u Komori...

Održani poslovni susreti sa slovenačkim firmama

Saradnja Veleposlanstva Republike Slovenije i slovenačkih preduzeća - Upoznavanje sa novim tehnologijama, novim načinom djelovanja konzorcija, nastupanja na javnim tenderima, implementacijom investicija putem "Javno-privatnog partnerstva" i razvoja tehnologija



Veleposlanstvo Republike Slovenije, u saradnji sa renomiranim slovenačkim preduzećem IMP d.d. (www.imp.si) i konzorcijskom grupom iz BiH, „Sendo“ doo Sarajevo, JU „IUGE RS“ Banja Luka i „INZIO“ dd Tuzla, organizovali su poslovni skup u Kantonalnoj privrednoj komori Tuzla. Tokom susreta prezentovana je inovativna PVA MBBR tehnologija primjenjena u gradskim pročišćavacima otpadnih voda bazirana na osnovu PVA gel kuglica, mobilna jedinica DYNAMIS za uništavanje biološkog, infektivnog medicinskog i ostalog otpada (uključujući uništavanje mulja) uz pomoć tehnologije termičke oksidacije energetskim iskorištavanjem. Istaknuto je ovom prilikom kako su postignuti rezultati do četiri puta manji reakcijski bazeni, jednostavan i stabilan proces biološkog pročišćavanja, mali troškovi održavanja i do 60% manje mulja koji je potpuno mineraliziran bez mirisa i negativnih uticaja na okolinu. Na skupu će biti prezentirane IMP d.d., konzorcij „Sendo“ d.o.o, JU „IUGE RS“ i „INZIO“ d. d. Osim njih, predstavljeno je i slovenačko preduzeće HASKAP d.o.o koje se bavi implementacijom mogućnosti uzgoja novih perspektivnih

sorti jagodičastog voća – HASKAP. Firma BLC inženjering d.o.o Laktaši, kao ovlaštenu predstavnik HESALIGHT iz Danske, nudi zamjenu gradske, cestovne, industrijske i ostale rasvjete sa najsavremenijom tehnologijom LED rasvjete, sa beskamatnim finansiranjem i otplatom investicije u roku 5 godina i grejs periodom od 6 mjeseci. Investicija se, istaknuto je, otplaćuje isključivo od ušteda, za koje HESALIGHT garantuje do 80%.



Poslovni skup je pobudio veliko interesovanje pa je zabilježeno prisustvo kantonalnih ministara, predstavnika općina sa područja Tuzlanskog kantona. Prezentacija zajedničkog djelovanja konzorcija je upriličena s namjerom upoznavanja sa novim tehnologijama, novim načinom djelovanja konzorcija, nastupanja na javnim tenderima, implementacijom investicija putem "Javno-privatnog partnerstva" i razvoja tehnologija iz oblasti obuhvaćenih prezentacijama.

D.K.



Ambasadorica Cormack u posjeti TK...

Prijem u Komori i razgovor sa privrednicima TK

Skupština RMU Banovići odobrila izbor Dongfang Electrica za strateškog partnera - Potpisani ugovori za izgradnju Termoelektrane u Banovićima – Izgradnja počinje sredinom naredne godine – Udaranje temelja energetskog sektora Bosne i Hercegovine za budućnost -

Ambasadorica Sjedinjenih Američkih Država u BiH Maureen E. Cormack boravila je u službenoj posjeti Tuzli. Razlog posjete je odavanje počasti i polaganje cvijeća na bistu Martina Lutera Kinga koja je kao poklon Ambasade Sjedinjenih Američkih Država u BiH, u Tuzli postavljena 2003. godine a u okviru obilježavanja Dana dr. Martina Lutera Kinga. U okviru posjete Tuzli, Kantonalna privredna komora Tuzla je za ambasadoricu Sjedinjenih Američkih Država u Bosni i Hercegovini, Nj. E. gđu Maureen Cormack, organizovala susret sa privrednicima, predstavnicima "Želim vas pozdraviti u ime privrednika Tuzlanskog kantona, u ime firmi članica Komore, predstavniak UO Komore i svoje ime. "Veliko nam je zadovoljstvo i čast što ste odvojili vrijeme i u okviru posjete Tuzli planirali ovaj susret sa privrednicima Tuzlanskog kantona. Raduje nas sve da je ovo bio kako za vas, tako i za nas jedan veoma uspješan dan, okončan veoma uspješnim sastankom, razgovorima o privrednim temama u Kantonalnoj privrednoj komori Tuzla", poželio je dobrodošlicu ambasadorici Nedret Kikanović predsjednik Kantonalne privredne komore Tuzla. Predstavljen je ovom prilikom rad Komore te mogućnosti privrede na području Tuzlanskog kantona, sfere potencijalnih privrednih investicija, značajnijih privrednih subjekata sa područja Tuzlanskog kantona, ujedno, firmi članica Komore.

za političkom reformom, potreba za ekonomskom reformom, borba protiv korupcije, unapređenje obrazovnog sistema, te rad na zajedničkoj viziji za budućnost ove zemlje", istakla je ambasadorica. "U Komori sam da slušam o tome šta privreda ovog područja može da ponudi. Da čujem vas, uspješne poslovne ljude, koji su to problemi sa kojima se susrećete u svom radu, da čujem i sagledam mogućnosti unapređenja privrednih prilika, povećanja zapošljavanja mladih na ovom području. Želim da s vama razgovoram o tome koje su nove mogućnosti da se oporave ekonomske prilike i šta u tom pogledu mi kao Ambasada možemo uraditi i kako vam možemo pomoći. Sve što smo danas čuli, jako je korisno, interesantno i sve sam sa oduševljenjem poslušala. Ograničena sam vremenom, ne mogu odgovoriti na sve probleme ali možemo se dotaći pojedinih segmenata, pokušati ih riješiti. Mi imamo jedan novi projekat koji ima za cilj riješiti parafiskalne namete. Ne iznanduje nas da postoje određene prepreke u realizaciji tog projekta ali ćemo ponovo razgovarati, direktno od privrednika saznati potpune informacije i dobiti smjernice kako da djelujemo. SAD je stalo do uspjeha Bosne i Hercegovine i želimo da američki investitori dođu u Bosnu, investiraju ovdje i uspješno posluju", zaključila je ambasadorica Cormack.



Prilikom da se uvaženoj ambasadorici predstave imali su predstavnici firmi RMU Banovići, Termoelektrana Tuzla, "Širbegović" Gračanica, "Kula" Gradačac, Fabrika cementa Lukavac, "Herceg" Srebrenik, "Unis tok" Kalesija, "Grin" Gračanica. Bila je ovo prilika za razgovore o mogućnostima uspostavljanja privredne saradnje i razgovore o potencijalnim investicijama privrede SAD na području Tuzlanskog kantona. Ambasadorica Cormack je izrazila zadovoljstvo što se nalazi u Tuzli, što ima priliku razgovarati sa privrednicima o mogućoj saradnji, stvaranju kvalitetnijih privrednih veza koje su ujedno i garant sigurnijeg i ljepšeg življenja za mlade na području Tuzle i Tuzlanskog kantona te cijele Bosne i Hercegovine. Navela je ambasadorica Cormack pet ključnih problema s kojima se ljudi u BiH danas suočavaju. "To su potreba

"Čuli ste ovdje u Komori da postoje realne mogućnosti da se unaprijedi poslovni ambijent. Upoznali ste privrednike koji zapošljavaju prilično velik broj radnika a ujedno, ističu mogućnost otvaranja novih radnih mjesta. Mi kao Komora i kao servis privrede, želimo zajedno sa vama radimo na popravljajući poslovnog okruženja, edukaciji naših privrednika, da vam budemo partneri u saradnji a dokazali smo da možemo adekvatno odgovoriti svim zadacima i obavezama", rekao je na kraju sastanka predsjednik Kikanović.


D.K.



Posjete kantonalnih ministara predsjedniku Komore...

Kantonalni ministri su upriličili posjete predsjedniku Kantonalne privrede komore Tuzla

Posjeta Mirsada Gluhića ministra za trgovinu, turizam i saobraćaj, Srđana Mićanovića ministra za industriju, energetiku i rudarstvo i Nermina Hodžića ministra za razvoj i poduzetništvo u Vladi Tuzlanskog kantona



Mirsad Gluhic ministar za trgovinu, turizam i saobraćaj u Vladi Tuzlanskog kantona sa saradnicima, bio je u posjeti Nedretu Kikanoviću predsjedniku Kantonalne privredne komore Tuzla i njegovim najbližim saradnicima. Prva zvanična posjeta novoimenovanog ministra Komori, bila je prilika za razgovor o pravcima buduće saradnje ministarstva i Kantonalne privredne komore Tuzla, sve u cilju stvaranja povoljnijeg poslovnog ambijenta na području Tuzlanskog kantona. Ministar Gluhic i predsjednik Kikanović su istakli značaj kontinuiranog rada na podršci domaće proizvodnje kroz projekat "Kupujmo domaće", razgovarali o mogućnostima uključivanja predstavnika Komore u rasprave i aktuelnu problematiku u oblastima trgovine, turizma, ugostiteljstva te o oblasti saobraćaja kada je u pitanju usklađivanje redova vožnje. Predsjednik Kikanović je ministra Gluhica upoznao sa planovima Komore u 2016.godini a u skladu sa Planom i Programom rada Komore za ovu godinu. S tim u vezi, predsjednik Kikanović je najavio skoro pokretanje projekta "Domaći partner" koji treba podstaći međusobnu trgovinu između privrednika na području Tuzlanskog kantona, firmi članica Komore.

U posjeti Komori, boravio je i Srđan Mićanović ministar za industriju, energetiku i rudarstvo u Vladi Tuzlanskog kantona. Tema posjete bila je dogovor smjernica za organizovanje zajedničkog sastanka Upravnog odbora Kantonalne privrede komore Tuzla i Vlade Tuzlanskog. Bilo je riječi o mogućnostima uspostavljanja kvalitetnije i intenzivnije saradnje ovog ministarstva i privrednika koje predstavlja Komora.

Sa Nerminom Hodžićem ministrom za razvoj i poduzetništvo u Vladi Tuzlanskog kantona, predsjednik Kikanović je razgovarao o razvojnim pravcima privrede TK sa akcentom na zapošljavanje. Istaknuta je ovom prilikom spremnost Vlade TK da u saradnji sa Komorom, pokrene aktivnosti na razvoju privrede koje će dovesti do otvaranja novih radnih mjesta, povećanju stope zaposlenosti na području Tuzlanskog kantona.

D.K.

Nova članica Komore...

"Camel" agencija za nekretnine



Camel d.o.o. je privredno društvo osnovano 1990. godine, sa sjedištem u Tuzli. U sklopu proširenja djelatnosti i poslovanja, 2014. godine osnovana je agencija za nekretnine. "Naš cilj je da, zahvaljujući višedecenijskom iskustvu u građevinskim poslovima, prometovanju nekretninama i investiranju u iste, te poznavanju tržišta nekretnina, pružimo kvalitetnu uslugu našim klijentima. Zbog nedovoljne zakonske reguliranosti ove oblasti, ostavljen je širok prostor za mnoge manipulacije koje mogu biti na štetu učesnika u prometu nekretninama, zbog čega je preporučljiva saradnja sa pouzdanim agencijama za nekretnine. Naša ideja vodilja je da svaka roba ima svoga kupca, samo ga je potrebno pronaći, a to nam omogućava širok spektar saradnika i obimna lista klijenata, kako iz države, tako i iz inostranstva, kao i velika ulaganja u marketing. Pri obavljanju naših djelatnosti saradujemo sa najuglednijim notarskim i advokatskim uredima,

kao i ovlaštenim sudskim vještacima građevinske i ekonomske struke, kao i mnogim građevinskim firmama, uredima za uređenje enterijera i slično", ističu u firmi "Camel". Osnovne djelatnosti firme su posredovanje u prodaji, kupovini, iznajmljivanju i zamjeni nekretnina, procjena tržišne ili građevinske vrijednosti nekretnina, prikupljanje imovinsko-pravne dokumentacije, upravljanje nekretninama, otkupljivanje nekretnina, posredovanje u stečajnim i izvršnim postupcima, posredovanje, savjetovanje i povezivanje finansijskih, tehničkih i pravih elemenata potrebnih za realizaciju projekata, legalizacija nelegalno izgrađenih objekata, parcelisanje zemljišta i ostale srodne usluge. Firma je smještena u ul.Mehmedalije Maka Dizdara u PZC Stupine. Kontakt je moguće putem telefona sa brojevima 061/641-424 i 062/333-150, te putem maila: camel.nekretnine@gmail.com.

D.K.



Iz Udruženja za trgovinu, ugostiteljstvo i turizam...

Ponovo ukazano na nepravilnosti u oblasti turizma

I pored Zakona o turističkoj djelatnosti, brojni primjeri rada bez licence – Veliki problem nedostatak podrške za razvoj lokalnog turizma – Neadekvatan tretman inicijative koju je Udruženje podnijelo Ministarstvu finansija FBiH



Kada su u pitanju redovne aktivnosti komorskih udruženja a u okviru predviđenih programa rada, značajno je pomenuti i da je u Udruženju za trgovinu, ugostiteljstvo i turizam Kantonalne privredne komore Tuzla održan je sastanak Odbora Udruženja, u proširenom sazivu. Pojačani za predstavnike Ministarstva za trgovinu, turizam i saobraćaj Tuzlanskog kantona i Kantonane uprave za inspeksijske poslove članovi Odbora Udruženja su raspravljali o aktuelnim problemima u oblasti turizma, o nelegalnom radu na koji iz ovog komorskog Udruženja ukazuju već godinama. A primjera je sve više, nažalost. “Zakon o turizmu na području TK, koji je usvojen prije više od godinu i po dana, jasno pokazuje da je za rad u turističkoj djelatnosti potrebna licenca. Uprkos tome, još uvijek se veliki broj fizičkih lica bavi turističkom djelatnošću bez dozvole i na taj način ubire velike prihode. Zbog toga oni koji se legalno bave ovom djelatnošću trpe najveće gubitke”, već godinama na silne propuste ukazuje Asim Bečić član Odbora Udruženja. Nelegalan rad nije jedini problem s kojim se suočavaju radnici u oblasti turizma. Nedostatak podrške i poticaja otežava razvoj lokalnog turizma, ukazali su predstavnici komorskog Udruženja za trgovinu, ugostiteljstvo i turizam. Istaknute su značajne turističke destinacije na području Tuzlanskog kantona koje nisu iskorištene i koje nisu adekvatno pozicionirane u turističkoj ponudi BiH i TK.



“Želimo dati svoj doprinos otklanjanju nepravilnosti kako se ne bi pjačavale aktivnosti na nelegalnom radu a s druge strane i da zaštitimo sebe, nas koji poslujemo po zakonima ove države i ovo kantona. Veliki je broj subjekata koji su već dugo u sferi nelegalnog rada a nisu sankcionisani, veliki je broj primjera na svakom koraku, svakodnevno i uopšte nije teško doći do spoznaja ko i kako radi,

da li je firma legalna ili ne i da li će na kraju korisnici usluga dobiti ono šta plate. Moramo čuvati ugled naše djelatnosti a u velikoj mjeri nas u tome sputavaju oni koji rade na crno. Tašna-firme su veliko zlo u ovoj zemlji i direktno štete razvoju privrede pa je valjda logično da se država pobrine i spriječi njihovo djelovanje a zaštititi legalne privredne subjekte koji pune budžete”, izjavio je Asim Bečić. Upravo iz ovog razloga su na sjednicama Odbora ovog Udruženja u posljednje vrijeme prisutni predstavnici resornog kantonalnog ministarstva i Kantonalne uprave za inspeksijske poslove. Predočene su im nepravilnosti, smetnje u normalnom radu firmi, ukazano direktno na one koji štete državi e sve da bi se nešto promijenilo, da bi došlo do željene reakcije nadležnih.

Na sjednici je predstavljen i odgovor Ministarstva finansija FBiH e na, ovog Odbora, upućenu inicijativu za izmjene i dopune Uredbe o uslovima i načinu plaćanja gotovim novcem. Kako je istaknuto na sjednici Odbora Udruženja, odgovor ne nudi nikakvo povoljno rješenje za poboljšanje privrednog ambijenta, zbog čega će privrednici morati poduzeti konkretne korake.



“Sa žaljenjem moram ustvrditi dvije stvari. Prvo, do sada niti jedna odluka ili uredba iz Vlade FBiH nije donijela poboljšanje privrednog okruženja. S tim u vezi su logična naša strahovanja da ćemo imati još nestabilnije privredno okruženje, više nezaposlenih, manje privrednih subjekata, manje stranih investicija. Sve je usmjereno, konkretno kada je u pitanju odgovor na našu inicijativu, na mlin bankarskog sektora, e da bi bankarski sektor ostvario što veću dobit. I drugo što sa žaljenjem moramo primjetiti da problemu na koji smo ukazali pri uslovima i načinu plaćanja gotovim novcem i uputili u Federalno ministarstvo inicijativu, nije adekvatno pristupljeno. Nismo imali nikakvu podršku, nismo ni dobro organizovani a posebno žalosti činjenica da nismo imali podršku ostalih privrednih komora u Federaciji, ni predsjednici komora u Federaciji nisu naš zahtjev adekvatno ispratili i tu leži razlog što je inicijativa prošla ovako loše”, izjavio je Kasim Selimović predsjednik odbora Udruženja za trgovinu, ugostiteljstvo i turizam Kantonalne privredne komore Tuzla. Dodao je da će pokrenuti nove aktivnosti na povezivanju privrednika u Federaciji kako bi se kvalitetnije pristupilo problemima koji opterećavaju privredu. Naredni sastanak će biti upriličen početkom marta e na temu bankarskog sektora u službi privrede...

D.K.



Iz Kantonalne privredne komore Tuzla...

Instruktivni pripremni seminar za polaganje pravosudnog ispita

Obavještavamo Vas da Kantonalna privredna komora Tuzla u saradnji sa sa Federalnim ministarstvom pravde Bosne i Hercegovine i Ministarstvom pravosuđa i uprave Tuzlanskog kantona organizuje

INSTRUKTIVNI PRIPREMNI SEMINAR ZA POLAGANJE PRAVOSUDNOG ISPITA



Cilj seminara je da se diplomiranim pravnicima koji ispunjavaju zakonom propisane uvjete za polaganje Pravosudnog ispita omogući da steknu dodatna znanja i praktična iskustva od strane predavača iz pojedinih pravnih oblasti, imenovanih od strane Federalnog ministarstva pravde, te time olakšaju pripremu za izlazak na ispit. Seminar traje 120 časova a obuhvata problematiku iz svih stručnih predmeta koji su predviđeni programom za polaganje pravosudnog ispita. Predavači su eksperti iz pojedinih oblasti.

Seminar će se obavljati u velikoj sali Kantonalne privredne komore Tuzla u dane vikenda i prilagodit će se polaznicima. Molimo, ukoliko ste zainteresovani za učešće na navedenom seminaru da popunjenu prijavu koja se nalazi u prilogu pošaljete na fax: 035 369-552 ili ili na našu e-mail adresu. Kontakt osoba Milica Vujec.

Povećan broj članica Komore

6 privrednih subjekata novi članovi Komore periodu januar/februar



Kada je u pitanju članstvo u Kantonalnoj privrednoj komori Tuzla, zadovoljstvo je istaći kako se nastavlja trend povećanja broja članica, iz mjeseca u mjesec. U posljednjih nepuna dva mjeseca velikom broju privrednih subjekata koje su potpisale članstvo u Komoru, pridružilo se još šest. Riječ je o slijedećim firmama koje su se odmah po učlanjenju u Komoru, aktivno uključile u rad granskih udruženja te izjavile spremnost za sudjelovanje na sajamskim manifestacijama u okviru zajedničke sajamske postavke pod nazivom "Privreda TK" koje će u narednom periodu za svoje članice organizovati. To su "Energyrimp" doo Tuzla, "Torre Nova" doo Gradačac, Tradicionalni i stari obrt "Aronija-Okanović" Tuzla, Haso Kamberović samostalni poljoprivrednik, "Grego-gtp" doo Kalesija i "Camel" doo Tuzla.

KANDIDOVANJE PROGRAMA UTROŠKA SREDSTAVA TRAJNOG REVOLVING FONDA

Na osnovu Zakona o federalnim ministarstvima i drugim tijelima federalne uprave, određaba Odluke o usvajanju Programa utroška sredstava Trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2015. godinu, Federalno ministarstvo energije, rudarstva i industrije o b j a v l j u j e JAVNI POZIV za kandidovanje programa utroška sredstava trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2015. godinu. Kompletan tekst javnog poziva i Programa na www.kpktz.ba.

D.K.



Značajna posjeta Banovićima...

Predsjednik FBiH Marinko Čavara posjetio Općinu i RMU "Banovići"

Oduševljenje pozitivnim poslovanjem – Otvaranje novih radnih mjesta – Preduzeće koje ima viziju budućnosti – Značajna podrška Federalne vlasti

Projekti izgradnje termoelektrane i cementare u Banovićima imaju punu podršku predsjednika Federacije Bosne i Hercegovine Marinka Čavara, koji nije krio oduševljenje tokom posjete Rudnicima mrkog uglja „Banovići“ i dugogodišnjim pozitivnim poslovanjem ovog preduzeća. Ovom prilikom je rečeno da se, uprkos krizi u brojnim privrednim društvima, Rudnici izdvajaju po tome što zapravo nikad nisu ni bili u recesiji, a novi projekti omogućit će i otvaranje brojnih novih radnih mjesta.



„Vidim ovdje jednu firmu koja nikad nije ni bila u recesiji, prema tome nije ni izašla iz recesije nego je poduzeće koje radi kvalitetno, koje ima viziju budućnosti i koje nastoji budućim generacijama omogućiti jednu normalnu egzistenciju na ovim prostorima, što je vrijedno svake pohvale“, kazao je predsjednik Čavara, prenosi portal volimtuzlu.ba. Premijer TK Bego Gutić zadovoljan je podrškom predsjednika Federacije BiH Rudniku. Mišljenja je da ovo preduzeće zaslužuje podršku svih nivoa vlasti, samim tim jer sedamnaest godina u kontinuitetu bilježi privredni rast i rast investicionih ulaganja, što u budućnosti donosi nova zapošljavanja i doprinos cijeloj državi. „Očekujemo da u narednom periodu, realizacijom projekata termoelektrane i cementare, RMU „Banovići“ poveća broj uposlenih, što je cilj svih nivoa vlasti, i Federalne i Kantonalne vlade“, izjavio je tokom posjete premijer Tuzlanskog kantona Bego Gutić. Realizacija jednog od najvećih projekata u zemlji – izgradnja termoelektrane u Banovićima itekako će doprinijeti daljem razvoju preduzeća, otvaranju novih radnih mjesta, proširenju postojećih kapaciteta, mišljenje je predsjednika Federacije BiH. U toku je završna faza potpisivanja ugovora sa bankom i izgradnja bi mogla početi već polovinom godine. Ovo je bila jedinstvena prilika da se predsjednik Čavara upozna sa trenutnim stanjem u preduzeću, ali i sa velikim razvojnim planovima. „Obzirom da smo ušli u značajne projekte i da smo poodmakli u fazi njihove realizacije podrška Federalne vlasti nam je itekako bitna“, rekao je direktor Rudnika Munever Čerčić, i dodao da „Ovih dana takođe pokrećemo proceduru oko cementare. Usmeno imamo saglasnost Federalne vlade da krenemo u tom pravcu i mi smo već na Upravi donijeli odluku da se pokrene procedura i ona će vrlo brzo biti i objavljena“.



Takođe, pokrenuta je i procedura za izgradnju rudnika krečnjaka koji je potreban kako za termoelektranu tako i za cementaru. Svi projekti bi trebali u 2019. godini biti u završnoj fazi.

D.K.



Novo iz "Nipexa"...

Stanica za tehnički pregled vozila

Usluge tehničkog pregleda vozila uz prateće usluge osiguranja i registracije vozila

Menadžment firme "Nipex" Tuzla, inače ovlaštenog Volkswagen prodajno-servisnog centa, nastavlja sa unaprjeđenjem svojih djelatnosti, sa pružanjem što kvalitetnijih usluga svojim klijentima. Ono što je zacrtano, to je i učinjeno, po starom dobrom običaju u porodici Nišandžić.



Kako je za Komorski informator izjavio vlasnik "Nipexa" Pejo Nišandžić, jedna ideja se dugo "kuhala". Razmišljalo se šta i kako. Planiralo se učiniti najbolje i najkvalitetnije, zacrtali se ciljevi i rokovi i krenula je realizacija novog projekta. Veliko je zadovoljstvo na licima svih uposlenih u "porodici Nipex", zbog još jedno velikog iskoraka i uspješno obavljenog posla. Krajem decembra prošle godine, tačno sa zacrtanim rokom, projekat je završen, počelo se sa pružanjem novih usluga. Riječ je o uslugama tehničkog pregleda vozila uz prateće usluge osiguranja i registracije vozila, koje je od sada moguće obaviti u "Nipexu".



Na 7000 kvadratnih metara zemljišta, u neposrednoj blizini postojećeg i svima poznatog prodajno-servisnog centra, niknuo je novi objekat. Riječ je o savremeno i kvalitetno izgrađenom prostoru, površine 2600 kvadratnih metara, predviđenim za Stanicu za tehnički pregled vozila, novi i veći servis, novi i veći prodajni salon. Kada je u pitanju servis i prodajni salon, riječ je o drugoj fazi projekta, o segmentima oko kojih će, sigurni smo, "koplja lomiti" najkvalitetniji svjetski brendovi kada je autoindustrija u pitanju. Odluka neće biti laka, kome "ustupiti" taj prostor, ko je sličnih vizija, ko dugoročno

planira kao Nišandžići, ko je pouzdan partner i ko zadovoljava kriterije da stane rame uz rame s "Nipexom", sve su pitanja na koja ćemo u dogledno vrijeme dobiti odgovor, vjerovatno onog momenta kada se uključi svjetlo u reklami na novoj zgradi i kada novi brend već uparkira svoja vozila u prodajni salon.



Do tada, uživat ćemo u najsavremenijoj opremi za tehnički pregled vozila, sve po EU standardima. Kvalitetno i moderno opremljena stanica sa isto tako opremljenim pratećim sadržajima i prostorima, neophodnim za usluge osiguranja i registracije, sve na jednom mjestu. Projekat je "skuhan" i realizovan za ukupno 2 godine, finansijski predstavlja značajnu investiciju, došlo se do onoga što je zamišljeno a što predstavlja kompletiranje usluga, cjelovitost ponude, ujedno, otvorilo je nova radna mjesta. Baš sve onako kako su Nišandžići navikli sve u okruženju, svoje klijente, kako su u konačnici odgovorni i obavezni sami prema sebi, profesionalno i visoko kvalitetno. Dobrodošlica u Nipex važi već dugo, a sad je samo "podebljana" pozivom na obavljanje neophodnih radnji za vaše ljubimce: tehnički pregled, osiguranje, registracija, pa uz nadaleko i naširoko poznatu kvalitetnu uslugu u servisu i prodajnom salonu Volkswagena, dobijamo kompletnu sliku "Nipexa". Vjerujemo da se na ovome, neće stati...

Pripremio: Dino Kalesić



Nagrade, druženje i ispraćaj...

Obilježeno uspješno poslovanje u “Piemontu” Tuzla

Ostaće upamćeno druženje radnika firme “Piemonte” doo Tuzla. Bilo je veselja, odisalo je zadovoljstvom zbog uspješno odrađenih svih zadataka, obaveza, planom i programom zacrtanih ciljeva u prošloj godini, e bilo je i suza, emocije, pjesme i poklona na ispraćaju radnih kolega. Slavilo se i nagrađivalo u “Piemontu” a sve je smislio i organizovao vlasnik firme Kasim Selimović sa najbližim saradnicima a za uposlenike kompanije.



„Kao što je poznato naša kompanija je uspješno počela 2015. godinu nastavkom izvoza mesa za Tursku. O našem velikom uspjehu najbolje govore informacije koje upravo ovih dana imamo priliku da čitamo i slušamo, koliko je taj projekat značio za BiH a da se zvučnih imena, poznatih kompanija u BiH jedino u negativnom kontekstu ne pominje upravo naša firma. To je najbolja potvrda našeg pravca kojim se krećemo od samog početka do dana današnjeg i spravom želim da istaknem da je najteže biti pošten, ali je to jedini siguran put opstanka, razvoja i uspjeha. Pored niza poteškoća koje nam nameću nestabilna politička i ekonomska situacija mi smo u 2015 postigli najveće poslovne rezultate, znatno povećali bruto prihod u odnosu na 2014. godinu, povećali broj zaposlenih, državi i svim drugim povjericima uredno servisirali sve obaveze, bili i ostali društveno odgovorna kompanija prema socijalno ugroženim kategorijama za koje smo izdvojili značajna finansijska sredstva podržali razne infrastrukturne projekte, sportske klubove, kulturne manifestacije i mnoge druge aktivnosti i na kraju našli mjesto u industriji i postali vlasnici jedne među tri najveće proizvodne kompanije u BiH. Želim da istaknem da je to bila moja životna želja. Danas kad je ona postala stvarnost želim da na kraju 2016. godine taj isti proizvodni pogon bude faktor bržeg razvoja naše kompanije. Također, želim da istaknem i pored činjenice da se takav zaključak i sam nameće, da je poslovna politika menadžmenta rezultat dobre pozicije naše kompanije na tržištu BiH koja se svrstava u red velikih i sigurnih kompanija, sa kojim imaju interes da uspostave poslovnu saradnju svi proizvođači, banke, veliki potrošači, jer važim za sigurno i urednu kompaniju. Poslije ovih skromnih podataka s pravom mogu da istaknem da je poslovna politika menadžmenta bila na visini svog zadatka pored činjenice da privredni ambijent i okruženje u kojem djelujemo je otežavajući faktor ispravnom poslovnom politikom adekvatnim uslovima rada motivisanom radnom snagom, podrškom poslovnih partnera korektnim odnosom državnih institucija je rezultate ekonomske stabilnosti firme. Poštovani uposlenici, posebna zahvalnost pripada vama koji ste presudan faktor uspjeha i razvoja ove kompanije. Svima vama velika hvala a neke od pojedinaca želimo da istaknemo dodjelom priznanja i novčane nagrade i time dokažemo da rad i odnos prema kompaniji nije ostao nezapažen”, riječi su Kasima Selimovića direktora i vlasnika firme “Piemonte” doo Tuzla. Podijelio je zadovoljstvo i dobar poslovni rezultat u 2015. godini i iskoristio se ovom svečanom prilikom da nagradi istaknute pojedince i to

novčanim nagradama od 200 do 1000 KM. Nagrađeni su: Advija Brkić, Nusreta Bešić, Aida Hasikic, Elvira Kadic, Alisa Bukvarević, Mirzana Hadzic, Emina Hadzic, Erna Begovic, Razija Mujezinović, Adel Fatic i Zajim Djedovic. Nagrade i priznanja uručio je marketing manager Selimović Muamer.



Pored obilježavanja uspješno okončane poslovne godine, dodjele nagrada i priznanja ova kompanija je ispratila u zasluženu penziju Selviju Simić koja je u Piemontu upisala 20 godina radnog staža. “Želim u ime firme i u svoje ime, iskazati veliku zahvalnost našoj saradnici za sve što je učinila za ovo privredno društvo u dvije decenije vrlo odgovornog i uspješnog rada. Selva je bila i ostala veliki čovjek, dobar saradnik iskren prijatelj. Njen doprinos razvoju firme u vremenu njenog nastanka od 1995. godine, daljeg uspješnog poslovanja pa sve do današnjih dana je ogroman i vrlo značajan za sve one koji danas rade i one koji će u buduće naći svoje zaposlenje u istoj. Želim da istaknem da je ovo prvi događaj u istoriji naše firme kojim obilježavamo ispraćaj jednog radnika u penziju, a koji je više od dvije decenije radnog vijeka poklonio i ugradio u temelje ove firme. Ovaj događaj želim da obilježimo sa velikim poštovanjem osobe koja je u najtežim trenucima stavila sebe u funkciju ovog privrednog društva, u vremenu velike neizvjesnosti kad se živjelo i radilo od danas do sutra, kao da je znala da će ovo privredno društvo 20 godina kasnije nositi epitet uspješnog privrednog društva na nivou BiH pa čak i van granica BiH. Takvu firmu je Selva gradila i ostavila u nasljedstvo generacijama koje dolaze. Osim svakodnevnih obaveza kojima je prilazila odgovorno i iste rješavala ažurno Selva se isticala nesebičnim odnosom prema mladim uposlenicima na koje je prenosila svoje veliko znanje i bogato iskustvo. Ti i takvi su danas nosioci niza poslovnih aktivnosti koje uspješno obavljaju. Zato, i zbog još mnogo toga što ovim kratkim obraćanjem nismo iznijeli, kažemo Selva hvala ti, hvala ti za naš uspjeh i ogroman trud koji si uložila na izgradnji imidža uspješne i poštene firme. Iz života je poznato da svaki rastanak izaziva tugu i bol i ostavlja neizbrisive tragove koji ostaju trajno u naslijeđstvu ove firme i svih onih na koje je Selva prenijela svoje znanje, iskustvo i korektan odnos prema privrednom društvu u kojem je provela dvije decenije života i rada. U ime kompanije “Piemonte”, svih zaposlenih, u ime moje porodice i moje lično ime upućujem iskrene želje da vas i vašeg supruga prati dobro zdravlje, sreća i dug život”, rekao je direktor Kasim Selimović.

Pripremio: Dino Kalesić



Apsurdi Bosne i Hercegovine...

“Solana” Tuzla povećala proizvodnju i izvoz - država uvozi so

“Ovdje dolazimo do one famozne parole “kupujmo domaće”. Jedno se proklamuje, a drugo radi. Uvozna so se isporučuje domaćim naručiocima, trgovci uzmu novac i ovdje ne ostavljaju ništa. Mi od svake prodane tone soli 90 posto sredstava ostavimo državi, njenim kompanijama, školstvu, zdravstvu i drugima”

Tuzlanska Solana prošlu godinu završila je s najboljim poslovnim rezultatima u poslijeratnom razdoblju. Ukupno je proizvedeno 128.000 tona soli, što je najveća proizvodnja od 1992. godine, a što je za 5,5 posto više od plana. Istovremeno, na tržište je plasirano 141.000 tona različitih proizvoda na bazi soli. Ovaj naizgled nelogični podatak generalni direktor Solane Izudin Kapetanović objašnjava činjenicom da je osim redovne proizvodnje na domaće i inostrano tržište plasirano i oko 13.000 tona soli sa zalihama. “Ono što je za nas i državu BiH najznačajnije, jeste da smo izvezli oko 120.000 tona soli, čime smo izvoz povećali za 80 posto. Vratili smo cjelokupno prijeratno tržište na prostoru bivše Jugoslavije, a osvojili smo nova u Švicarskoj, Njemačkoj, Austriji i Mađarskoj”, kaže direktor Kapetanović. Ukupna vrijednost ostvarene godišnje proizvodnje procjenjuje se na oko 30 miliona maraka. Inače, najveća proizvodnja u 130 godina dugoj historiji Solane ostvarena je nekoliko godina prije rata kada je proizvedeno 202.000 tona vakumirane soli. “To se dogodilo zahvaljujući proizvodnji u tri pogona kapaciteta 175.000 tona soli, dok smo u 2015. godini proizveli 128.000 tona u jednom pogonu kapaciteta 75.000 tona soli. Kapacitete smo unaprijedili brojnim tehnološkim i tehničkim inovacijama”, objašnjava direktor Solane. Podsjeća da je Solana vlastitim sredstvima proizvodnju i pakovanje povezala sa visokoregalmim skladištem transportnim sistemom tunelskog tipa, uz ulaganja od oko 15 miliona maraka kreditnih sredstava, koje preduzeće uredno otplaćuje.



Kad država ne kupuje domaće: Umjesto tuzlanske, uvezeno 7.000 tona morske soli

Jedini domaći proizvođač soli, tuzlanska Solana, na dva javna natječaja za isporuku soli za puteve u Federaciji BiH nije prošla, javila je Fena. Umjesto kvalitetne domaće, uvezeno je oko 7.000 tona hemijskih neekvalitetne soli – kažu u ovoj fabrici. Generalni direktor Solane Izudin Kapetanović navodi da su dobili objašnjenje

da je uvozna morska so prošla na tenderima, jer je veće granulacije i navodno više odgovara zimskom održavanju puteva. “Mi smo naručili stručne analize koje su pokazale da naša so bolje otapa led na cestama, kao i da je hemijski mnogo čistija od uvozne”, ističe direktor Kapetanović. Tvrdi da su tehnolozi dokazali da morska so ima tri posto vlage, a tuzlanska 0,1. Domaća so nema nikakvih štetnih primjesa, dok morska, kako je dodao, ima tri posto radioaktivnih sastojaka, cinka, olova i drugih nečistoća. “Kada se pospe na cestu morska so, vjetar odnese te nečistoće i na naše njive, ona odlazi s kišom u kanalizaciju i vodotokove. Možda naizgled tri posto nečistoća ne izgleda puno, ali na 100.000 tona to su tri tone nečistoća i materija štetnih po ljudsko zdravlje. Dalje, tuzlanska so za razliku od morske ne sadrži sulfat koji razara beton i nagriza čelične konstrukcije”, naglašava Kapetanović. Potcrtao je da Solana u Tuzli može zadovoljiti sve domaće potrebe za posipnim materijalom u zimskom periodu. Potrebe se procjenjuju na oko 60.000 tona, ovisno o tome je li zima oštra ili nije. Unatoč tome, Solana je za prošlu godinu ugovorila svega 12.048 tona ili četvrtinu svojih kapaciteta. “Najveći kupac je Direkcija za ceste Federacije BiH, koja je otkupila 3.650 tona soli za puteve. Nešto je uzelo preduzeće “Sarajevo putevi”, a ostalo su kupile općine i to su relativno male količine”, navodi direktor Solane.



Kada bi se za ceste naručivala domaća so, korist bi bila veća za cijelu državu, pa i za kompanije koje proizvode so i slanu vodu, poput Solane, lukavačke Sode, Rudnika Soli “Tetima” i druge. “Ovdje dolazimo do one famozne parole “kupujmo domaće”. Jedno se proklamuje, a drugo radi. Uvozna so se isporučuje domaćim naručiocima, trgovci uzmu novac i ovdje ne ostavljaju ništa. Mi od svake prodane tone soli 90 posto sredstava ostavimo državi, njenim kompanijama, školstvu, zdravstvu i drugima”, naglasio je Kapetanović. Poručuje da bilo kakvim uvozom robe, koje imamo u domaćoj proizvodnji, slabimo temelje države.

D.K.



Iz Rudnika soli “Tušanj” Tuzla...

Zabilježena rekordna proizvodnja

Problem slijeganja tla – Rudnik ima budućnost – Smanjen dug za električnu energiju – Eksploatacija u Tetimi još 40 godina

Uprkos brojnim opterećenjima i problemima iz prošlosti koji im otežavaju rad, uposlenici Rudnika soli d.d. Tuzla, tokom 2015. godine ostvarili su rekordne proizvodne rezultate u poslijeratnom periodu, iscrpivši 2,8 miliona kubika slane vode. Time su prebacili godišnji plan za 2,5 procenata, što je unijelo dodatnu dozu optimizma u rudnik koji je jedan od simbola grada Tuzle, ali i šire regije. “So se na ovim prostorima dobivala i mnogo prije srednjeg vijeka iz kojeg datiraju prvi pisani podaci o tome. Salines na latinskom znači grad solana, a svoj današnji naziv, Tuzla je dobila tokom perioda osmanske vladavine, jer tuz na turskom jeziku znači so. U periodu austrougarske vlasti, tačnije 1885. godine počinje industrijska eksploatacija soli”, pojašnjava za agenciju Anadoluja dr Amir Sušić, direktor rudnika.



Slijeganje tla

Usljed višedecenijskog nekontroliranog crpljenja, došlo je do slijeganja terena u centru grada, a da bi se to zaustavilo, izvršila su se planska potapanja jama u Tušnju. Zbog zatvaranja određenih jama i prestanka eksploatacije na lokalitetu slanah bunara, iznad današnjih Panonskih jezera, neki misle da je i rudnik zatvoren. Međutim, on sve vrijeme neprekidno radi, što zahtijevaju potrošači za koje se proizvodi. Voda iz jezera Modrac dovodi se do Tetime, izvan grada, na obroncima planine Majevice, gdje otapa kamenu so, a slanica se uz pomoć pumpi dalje transportuje za tri potrošača, a to su “Solana”, “Šiše džam”, fabrika sode Lukavac i “Panonika” za Panonska jezera u ljetnom periodu. Sušić nerijetko studentima na Rudarsko-geološko-građevinskom fakultetu u Tuzli, gdje predaje, objašnjava kako je dugogodišnje nekontrolirano crpljenje slane vode iz ležišta uzrokovalo deficit čvrste mase, a samim tim i slijeganje terena na površini, u krugu od pet kilometara kvadratnih. Ovaj je slučaj, ističe sagovornik, poprimio razmjere ekološke katastrofe, a tonjenje je na nekim mjestima u gradu veće od 15 metara, zbog čega su proteklih decenija, srušene stotine individualnih i desetine javnih objekata u centru grada, a raseljeno je oko 10.000 stanovnika. “Nažalost, sada su sve te štete pale na teret Rudnika, dok su se u bivšoj Jugoslaviji namirivale iz određenog fonda, kojeg više nema. To su višemilionski procesi i oni mogu ugroziti poslovanje rudnika, koji ima perspektivu zahvaljujući našim potrošačima. Radeći za njih, ostvarili smo rekordnu proizvodnju, koju ćemo zbog izraženih potreba ‘Šiše džama’, u narednoj godini povećati”, izjavio je Sušić.



Rudnik ima budućnost

Prema njegovim riječima, opterećujući su i dugovi za električnu energiju nastali tokom i nakon ratnih zbivanja kada je rudnik također morao raditi. U suprotnom je, podsjeća Sušić, mogla biti ugrožena sigurnost stanovništva i grada, jer je moglo doći do naglog obrušavanja dubokih jama. “Zbog tih opasnosti, slana voda se bacala, ali se morao održavati njen određeni nivo. Dug za električnu energiju uspjeli smo smanjiti na 160.000 KM, ali kamate su 2,5 miliona KM. Nadamo se skorom reguliranju dugova i otpisu kamata, o čemu smo vodili razgovore u Vladi Tuzlanskog kantona i Federalnoj vladi, kao i o finansijskoj konsolidaciji”, navodi direktor Sušić. Bez obzira na navedene prepreke u vidu dugova i odšteta, rudnik ima proizvodnu budućnost, u koju su, prema tvrdnjama direktora, proteklih mjeseci investirali blizu 4,6 miliona KM vlastitih sredstava za nove bušotine, rekonstrukciju transportnih sistema i izgradnju novih cjevovoda, te izgradnju novih rezervoara slane vode. Osim navedenih investicija, u narednom periodu u planu su istraživanja soli na lokalitetu Rasovca. “Određene procjene govore da bi se eksploatacija u Tetimi mogla vršiti još narednih 40 godina. Računajući na dozvole i infrastrukturu na nekom novom lokalitetu, pravo je vrijeme da se krene sa istraživanjima na Rasovcu, gdje postoji velika potencijalnost”, smatra direktor Sušić.

D.K.



Novosti iz Fabrike deterdženata...

Proizvode novih 100 tona Arixa

Riješeni problemi sa nabavkom sirovine - Saradnja sa trgovinskim lancima –
Nema ponuda za kupovinu Dite -

Osamdesetak radnika tuzlanske Fabrike deterdženata Dita proizveli su dosad 160 tona Arixa tenzo i isporučili ga svim većim trgovačkim lancima širom BiH. Prvih stotinu tona proizvedeno je uz pomoć sirovina koje je osigurao Bingo u zamjenu za ekskluzivno pravo prodaje prvog kontigenta, a ostatak je proizveden od vlastitih sredstava ove fabrike. Kako nam je kazao predsjednik Sindikata Dite Dževad Mehmedović, u planu je proizvodnja dodatnih 100 tona, koje će se također distribuirati u sve veće trgovačke lance.



Izvoz izgledan

„Imali smo problema sa nabavkom sirovine, jer nismo uspjeli unaprijed osigurati potrebne količine, ali sad se to ustabililo. Nakon Binga, imamo saradnju i sa Konzumom i drugim većim prodajnim centrima, kroz koje planiramo plasirati još 100 tona u dogledno vrijeme”, kazao je Mehmedović. Kako kaže, sama činjenica da proizvode dodatnih 100 tona govori o tome da se Arix tenzo prodaje. Pozitivne informacije o prodaji za Oslobođenje je potvrdio i stečajni upravnik Dite Hajrudin Kunalić, te kazao kako dalja proizvodnja Arixa zavisi isključivo od prodaje. „Zasad sve ide po planu. Prema nekim slobodnim procjenama, prodaja ide dobro, ali znat ćemo tek za mjesec je li to dovoljno. Sad sve zavisi od prodje. Mi smo pokrenuli proces proizvodnje, koji sada u potpunosti zavisi od prodaje”, kazao je Kunalić. U toku su i pripreme za izvoz Arixa na Kosovo, kako je bilo i planirano prije pokretanja proizvodnje. Kako nam je kazao Kunalić, ima nekih problema, koji se otklanjaju, a sve bi uskoro trebalo polučiti pozitivnim rezultatima. „Trenutno pripremamo dokumentaciju, imamo i malih problema sa drugom stranom, sa kontrolom proizvoda, ali mislim da sve ide u pozitivnom smjeru. Ono na što se sad baziramo jeste osiguravanje sistema plaćanja, jer ne smijemo napraviti ishitrene poteze i zbog uspostave ovakve saradnje po svaku cijenu ostati bez naknade za isporučenu robu”, kazao je Kunalić.

Prodaja Dite

Nedavno je istekao i zakonski rok za slanje ponuda na oglas o prodaji, koji je krajem decembra raspisao stečajni upravnik po nalogu vijeća povjerilaca. Na početnu cijenu od oko 19 miliona KM, kolika je procijenjena vrijednost firme, niko nije poslao ponude. „Nismo još imali nikakvih ponuda, ali ne odustajemo. Odluku o sljedećoj prodaji će donijeti vijeće povjerilaca, ali mislim da nećemo smanjivati cijenu”, kazao nam je Mehmedović. Iako nije bilo zvaničnih ponuda na oglas, kako je kazao Kunalić, javilo se nekoliko potencijalnih kupaca, koje su interesovale pojedinosti o fabrici. „Imali smo nekoliko neobaveznih razgovora sa potencijalnim kupcima, međutim, nije to to. Donekle je to i razmljivo, s obzirom na to da se radi o velikoj sumi novca, ali mislim da je dobro da imamo poziva ljudi koji se interesuju o pojedinostima”, kazao je Kunalić. Ponovna proizvodnja praškastog deterdženta Arix tenzo počela je 22. decembra, gotovo pola godine nakon ponovnog pokretanja proizvodnje tečnog deterdženta za suđe 3DE i drugih tečnih deterdženata. Stečaj u Diti je pokrenut u martu prošle godine i od tada radnici i stečajni upravnik pokušavaju revitalizirati ovu fabriku s ciljem što bolje prodaje strateškom partneru.

D.K.



Do jeseni izgradnja prilaznih svjetala...

Uspješna godina za međunarodni aerodrom tuzla

Povećan broj putnika – Očekuju se pozitivni finansijski rezultati – Stekli uslove za pokretanje kargo saobraćaja - Do jeseni izgradnja prilaznih svjetala – Posao za 64 nova radnika

Za Međunarodni aerodrom Tuzla prošla godina bila je izuzetno povoljna i uspješna. Uspjeli su povećati broj prevezenih putnika, kompanija Wizz Air otvorila je svoju bazu na ovom aerodromu, a kraj godine obilježilo je i dobijanje dozvole za prevoz proizvoda animalnog porijekla. "Protekle godine povećan je broj putnika koji su došli ili otišli sa aerodroma Tuzla te smo registrovali preko 260.000 prevezenih putnika, što je brojka koja nas čini sretnim i koja nam pokazuje da smo dobro radili", kazao je za Oslobođenje Rifet Karasalihović, direktor Međunarodnog aerodroma Tuzla. U ovom trenutku sa Tuzlanskog aerodroma letovi se obavljaju na devet destinacija, minimalno tri puta sedmično za svaku liniju.



"S obzirom na to da je Wizz Air otvorio bazu u Tuzli u šestom mjesecu prošle godine, od juna 2015. pa do kraja godine stalno se povećavao aviosaoobraćaj, a samim tim i broj putnika. Očekujemo da će to dati i pozitivne finansijske rezultate, tako da što se tiče putničkog saobraćaja mi se nadamo da ćemo povećati broj putnika u 2016", istakao je Karasalihović. Prema njegovim riječima, kad je u pitanju kargo saobraćaj, Aerodrom Tuzla dobio je saglasnost Vijeća ministara BiH da se sa Aerodroma Tuzla mogu izvoziti i uvoziti namirnice animalnog porijekla.

"Mi smo stekli sve tehničke, ali i takoreći političke, pravne uslove za otpočinjanje takvog saobraćaja. Naredne sedmice bismo trebali imati pregovore sa potencijalnim aviokompanijama, ali i sa kompanijama koje će izvoziti i uvoziti meso te se nadamo da ćemo tada imati konkretnije informacije kada bi to moglo da starta i sa kojim avionima", kazao je Karasalihović, dodajući da bi izvoz mesa mogao krenuti krajem januara ili početkom februara. Iz Tuzlanskog aerodroma istakli su da se nadaju da bi, u zavisnosti od finansijskih mogućnosti, mogli krenuti i u proširenje terminalne zgrade. "Mi svakako razmišljamo o tome kako bi što kvalitetnije opsluživali potencijalne putnike i kompanije koje saobraćaju sa ovog aerodroma, ali imperativ menadžmenta Aerodroma jeste da završi projekt prilaznih svjetala na Aerodromu Tuzla. Obezbeđena su finansijska sredstva za izgradnju tih svjetala i u ovom trenutku rješavamo imovinske odnose tako da se nadamo da ćemo do septembra ili oktobra ove godine završiti s tim projektom", naglasio je Karasalihović.



U prethodnoj godini došlo je do zapošljavanja određenog broja radnika. Naime, konkursna procedura je završena u decembra i primljeno je 100 radnika. "U startu je planirano da se, prema potrebama Međunarodnog aerodroma Tuzla, zaposle 64 radnika. Međutim, na moj prijedlog Nadzorni odbor je donio odluku da se zaposli još 36 radnika, koji će proći edukaciju, odnosno licenciranje, nakon čega ćemo izabrati 64 najbolja. U slučaju da u toku 2016. dođe do povećanja obima saobraćaja na Aerodromu Tuzla pozvali bismo i ostale koji su bili na spisku, a koji su zadovoljili sve konkursom tražene uslove", kazao je Karasalihović.

D.K.



Konkretni koraci za rješavanje problema u privrednim društvima...

Sastanak premijera Gutića i Novalića

Razgovor o trenutnom stanju i smjernicama za rješavanje poteškoća u privrednim društvima sa područja Tuzlanskog kantona

Premijer Tuzlanskog kantona Bego Gutić i ministar industrije, energetike i rudarstva Srđan Mićanović su sa premijerom Federacije BiH Fadilom Novalićem razgovarali o trenutnom stanju i smjernicama za rješavanje poteškoća u privrednim društvima sa područja našeg kantona, prenosi portal volimtuzlu.ba. Na sastanku je još jednom podcrtano opredjeljenje kantonalne i federalne vlade, te JP „Elektroprivreda BiH“ (EPBiH) i RMU „Banovići“, da kroz osnivanje zajedničkog preduzeća riješe pitanje ove fabrike i njenih radnika.



„Rudnicima i Elektroprivredi treba jedno ovakvo preduzeće iz oblasti metalske struke i mi i dalje stojimo na istom opredjeljenju. Kao što sam to rekao i na sastanku sa premijerom Novalićem u TTU-u sredinom novembra prošle godine, rokovi koje smo sebi tada postavili su preambiciozni, ali naš plan i pravac za rješavanje Tvornice transportnih uređaja i dalje ostaje“, rekao je premijer Gutić i dodao da Kantonalna vlada nema uticaj na vođenje i dinamiku stečajnog postupka, ali da postoji razumijevanje stečajne upravnice Alise Bijedić da se ova problematika, što prije riješi. Kako je rečeno na sastanku, kojem je uz direktora JP „EPBiH“ Bajazita Jašarevića i direktora RMU „Banovići“ Munevera Čergića prisustvovala i stečajna upravnica Bijedić, sredinom februara se nastavlja ispitno ročište i očekuje formiranje Skupštine i Odbora stečajnih povjerilaca u TTU-u. Nakon svog formiranja Skupština povjerilaca bi trebala donijeti neophodne odluke na temelju kojih će Elektroprivreda i Rudnik kupiti dio imovine TTU-a i formirati zajedničko preduzeće. Na sastanku sa premijerom Novalićem i ministrom energije, rudarstva i industrije FBiH Nerminom Džindićem razgovaralo se i penzionisanju 52 radnika živiničke Fabrike namještaja „Konjuh“. **„Vlada Federacije Bosne i Hercegovine je na tragu rješenja za ovu fabriku, ali je u ovom momentu nemoguće penzionisati radnike za koje nisu izmireni svi neophodni porezi i doprinosi. Resorno ministarstvo i Vlada Federacije će u narednim danima donijeti određene odluke, kojima će se pokušati premostiti trenutna barijera i omogućiti da „Konjuh“ reprogramira svoja dugovanja, a time radnike pošalje u zasluženu penziju**“, rekao je premijer Fadil Novalić. Također, dogovoreno je da u narednim danima upravljačke strukture EPBiH, donesu odgovarajuće odluke kojima bi se otpisale zatezne kamate za stara dugovanja Rudnika soli Tuzla. Rudnik će jednokratno izmiriti svoje obaveze po pitanju glavnice duga, a otpisom kamata znatno rasteretiti svoje buduće poslovanje. V.d. direktora Porezne uprave FBiH Šerif Isović je učesnike sastanka upoznao da Uprava u narednim danima planira raspisati Javni poziv za prodaju imovine firme „Gredelj-Revom“ iz Dobošnice kod Lukavca. Dalje je planirano da se na taj poziv jave i imovinu kupe „Željeznice FBiH“, za što su već osigurana finansijska sredstva. Time će se riješiti i pitanje radnika ove firme sa područja našeg kantona. Sastanku, na kome je još jednom iskazano jasno opredjeljenje Vlade TK da u zakonskim okvirima pomogne firmama i njihovim radnicima, prisustvovala je i savjetnik federalnog premijera Suvad Osmanagić.


D.K.



Iz Vlade Tuzlanskog kantona...

PODRŠKA SVIM PROJEKTIMA KOJI ZNAČE NOVE VRIJEDNOSTI

Kratak rezime prošlogodišnjih aktivnosti, te plan programa i projekata Udruženja za razvoj NERDA za 2016. godinu bile su tema sastanka premijera Tuzlanskog kantona Bege Gutića sa direktorom Regionalne razvojne agencije za ekonomsku regiju sjeveroistočna BiH Enesom Drjevićem.



Premijer Gutić je istakao da NERDA i Vlada Tuzlanskog kantona imaju dobru saradnju, koja je kroz realizaciju više dosadašnjih projekata polučila izuzetne rezultate. „S tim u vezi naša podrška svim aktivnostima NERDA-e koje znače proizvodnju novih vrijednosti je neupitna” rekao je premijer Gutić. Dogovoreno je da se u narednim danima organizira sastanak predstavnika ove razvojne agencije i Ministarstva razvoja i poduzetništva kako bi se precizno programirale zajedničke aktivnosti u ovoj godini, a sve kako bi se privrednicima i obrtnicima u što kraćem roku mogli ponuditi novi programi podrške.

PODRŠKA VLADE KANTONA RAZVOJU UNIVERZITETA

Premijer Kantona Bego Gutić susreo se na radnom sastanku sa rektorom Univerziteta u Tuzli Enverom Halilovićem. Između ostalih tema, razgovaralo se o modelima rješavanja smještaja četrdesetak studenata Akademije dramskih umjetnosti, koji nastavu slušaju u prostorijama Doma armije u Tuzli. Rektor UNTZ 27 01 2016Naime, kao što je poznato, prema projektu Evropske unije, vrijednom oko 3 miliona Eura, pomenuti objekat bi trebao biti srušen, a na njegovom mjestu izgrađena nova zgrada Općinskog suda u Tuzli.



Kao dugoročno rješenje spomenuta je i realizacija projekta rekonstrukcije i adaptacije jedne od zgrada u Kampusu Univerziteta, što je projekat čija bi realizacija u saradnji sa Turskom upravom za međunarodnu saradnju i razvoj, TIKa-om, trebala započeti ove godine. Dogovoreno je da u narednim danima predstavnici Univerziteta intenziviraju razgovore sa ovom turskom upravom i utvrde njihovu spremnost i priorititetnost za realizaciju ovog projekta. Premijer Gutić je ponovio svoje obećanje koje je dao i prilikom puštanja u rad podstanice za daljinsko zagrijavanje Kampusu, a to je da će „u slučaju da TIKa odustane od ovog projekta, kantonalna Vlada samostalno preuzeti sve obaveze i rekonstrukcijom jedne zgrade u Kampusu, studentima Univerziteta u Tuzli znatno poboljšati uslove za studiranje.” Rektor Halilović se premijeru Gutiću još jednom zahvalio na konkretnoj podršci koju Vlada pruža Univerzitetu ističući da je realizacija, za Univerzitet historijskog projekta spajanja Kampusu na sistem daljinskog zagrijavanja, otvorila dodatne potencijale za razvijanje i bolje iskorištavanje kapaciteta Kampusu. Na je sastanku razgovarano i o rješavanju određenih poteškoća u donošenju normativnih akata Univerziteta, kao i neophodnom prijemu novih uposlenika, a sve kako bi se stvorili preduslovi za njegov dalji rad i razvoj. Premijer Gutić je izrazio podršku Vlade Tuzlanskog kantona daljem razvoju Univerziteta i podsjetio da je Vlada u toku ove godine planirala i donošenje novog Zakona o visokom obrazovanju, a koji bi trebao biti usklađen sa sličnim zakonima iz zemalja Evropske unije.

D.K.



“Borplastika” Tuzla: Uređaji za pročišćavanje otpadnih voda - budućnost postoji...

Prečišćavanje tehnoloških otpadnih voda iz prehrambene industrije na konkretnom primjeru izvedenog sistema u mljekari

Tehnološke (industrijske) otpadne vode potrebno je prethodno pročititi prije dolaska do zajedničkog komunalnog postrojenja za obradu otpadne vode. Potreba za prethodnim pročišćavanjem industrijskih otpadnih voda posljedica je njihovog posebnog sastava, kao i neujednačene dinamike ispuštanja. Smanjenje opterećenja, kao i njihovo ujednačavanje tokom dana posebno je važno ako su otpadne vode jako opterećene organskim tvarima i ako nastaje velika količina otpadne vode u kratkom vremenu. Tehnološke otpadne vode nastaju tokom različitih tehnoloških postupaka kao i pomoćnih operacija (hlađenje, transport sirovina, uklanjanje otpadaka i sl.), čija kakvoća zavisi od sirovina koje se upotrebljavaju u proizvodnom procesu i dobivenom proizvodu. Prema vrsti zagađenja tehnološke otpadne vode dijele se na otpadne vode koje pretežno sadrže neorganske ili organske tvari, te biološki teže ili lakše razgrađive. Za pročišćavanje potrebno je primijeniti sljedeće postupke: mehanički predtretman, fizikalno-hemijski tretman, biološki tretman te dehidracija mulja. Riječi: tehnološka otpadna voda, pokazatelji opterećenja, fizikalno-hemijski tretman, biološko pročišćavanje, dehidracija mulja. Otpadne vode mliječne industrije sadrže u zavisnosti od svog proizvodnog programa, ostatke sirovog i pasteriziranog mlijeka, sirutke, maslaca, sira, jogurta, vrhnja, pudinga, dijelove ambalaže, plastike, mlijeka u prahu, sredstva za pranje, i čišćenje, kiseline, ostatke raznih proizvoda koji su se nalazili na ispitivanju u laboratoriju, mehanička ulja i masti, ulje za loženje, talog iz separatora, otpatke i slično. Sastav i količina otpadne tehnološke vode zavisi od primjenjenih tehnoloških procesa obrade mlijeka, te ova otpadna voda ne smije odlaziti direktno u kanalizaciju ili u prirodni recipijent, bez prethodnog tretmana na uređaju za pročišćavanje otpadnih voda. Mliječna industrija i mljekare koriste velike količine vode tokom obrade mlijeka, prerade, čišćenja i pranja. Prosječno se računa sa potrošnjom od 3-6 l vode po litri sirovog mlijeka, a potrošnja zavisi od proizvodnog programa, vrsti strojeva i broju radnih smjena. Potrebno je bilo napraviti uređaj za predtretman tehnoloških otpadnih voda iz postojećeg objekta mljekare. Recipijent obrađenih tehnoloških voda je gradski kanalizacioni sistem. Proizvodni program mljekare se sastoji od proizvodnje UHT mlijeka, običnog jogurta i kisele pavlake, bez proizvodnje sira što podrazumjeva isključenje nastanka i ispuštanje sirutke u tehnološke otpadne vode. Na lokaciji mljekare postoji izgrađen betonski trokomorni separator masti koji je potrebno uklopiti u postrojenje za predtretman tehnološke otpadne vode. Dnevni kapacitet prerade mljekare iznosi 50.000 l mlijeka. Očekivana potrošnja tehnološke vode iznosi 3 l po litri mlijeka, što čini dnevnu količinu otpadne vode $Q_d = 150 \text{ m}^3/\text{dan}$. Uređaj za predtretman otpadnih voda treba pročititi otpadnu vodu do razine dozvoljenih graničnih vrijednosti parametara za ispuštanje u javnu kanalizaciju, u skladu sa “Uredbom o uslovima ispuštanja otpadnih voda u prirodne recipijente i sisteme javne kanalizacije”, Službeni list F BiH 4/2012., i to za:

Tabela 1. Parametri kvaliteta pročišćenih otpadnih voda

PARAMETAR	VRIJEDNOST	JEDINICA
pH vrijednost	6,5-9	
HPK	≤ 700	mgO ₂ /l
BPK5	≤ 250	mgO ₂ /l
Ukupne suspendovane materije	≤ 400	mg/l

Kako je mljekara već postojeća i u pogonu, bilo se pristupilo mjerenju kvantitete i kvalitete tehnološke otpadne vode, pomoću mjerača protoka, automatskog uzorkivača i spektrofotometra. Dobivene su sljedeće vrijednosti:

Tabela 2. Izmjereni ulazni parametri

PARAMETAR	Najmanja vrijednost	Najveća vrijednost	Prosječna vrijednost
pH vrijednost	8,4	11,4	9,72
HPK (mgO ₂ /l)	1840	3570	2489
Količina otpadne vode (m ³ /dan)	43	193	128

Na temelju ulaznih parametara odabrano je predviđeno opterećenje prema kojem se dimenzionira uređaj za pročišćavanje tehnoloških otpadnih voda:

$Q_{max} = 200 \text{ m}^3/\text{dan}$

HPK = 3500 mg/l



BORPLASTIKA

OPIS PROCESA PROČIŠĆAVANJA TEHNOLOŠKIH OTPADNIH VODA MLJEKARE

Tehnologija pročišćavanja tehnoloških otpadnih voda je projektovana u skladu sa uslovima ispuštanja pročišćenih otpadnih voda u gradski kanalizacioni sistem. Kao optimalno rješenje sa tehnološkog i ekonomskog aspekta odabran je uređaj za pročišćavanje tehnoloških otpadnih voda koji se sastoji od kombinacije fi zikalno-hemijsko-biološkog pročišćavanja. Proces pročišćavanja tehnoloških otpadnih voda započinje ispuštanjem otpadnih voda preko interne kanalizacije i fi nog sita koje se nalazi u zadnjem oknu unutar mljekare, a prije ulaska u separator masti. Nakon mehaničkog predtretmana otpadna voda ulazi u podzemni betonski trokomorni separator masti. U njemu dolazi do izdvajanja mliječne masti iz otpadne vode na površinu, dok otpadna voda odlazi u prepumpno okno. Prepumpno okno opremljeno je dvjema elektro motornim potopnim pumpama koje se koriste za prepumpavanje otpadne vode u bazen za egalizaciju. Pumpe su instalirane u režimu radna + rezervna (1+1) i kapacitet pumpi je baziran na maksimalnom satnom protoku. Bazen za egalizaciju služi za prikupljanje i izjednačavanje koncentracija nečistoća u otpadnoj tehnološkoj vodi i za ublažavanje hidrauličkih udara tokom dana. U njemu se vrši intenzivno miješanje otpadne vode tokom dana pomoću aeracije sa velikim mjehurićima zraka. Ovim postupkom se spriječava stvaranje anaerobnih uslova u bazenu i neugodnih mirisa, ne dolazi do taloženja suspendiranih čestica i ne dolazi do izdvajanja masnoća na površini vode u bazenu. Aeracijom se ujedno postiže i oksidacija organskih tvari u otpadnoj vodi. Iz egalizacijskog bazena otpadna voda pomoću napojne pumpe odlazi na fi zikalno-hemijski tretman pomoću uređaja za fl otaciju tipa DAF (eng. "DAF - Dissolved Air Flotation"). Pri tome se u otpadnu vodu dodaju hemikalije za koagulaciju, fl okulaciju i pH neutralizaciju. Kao koagulant se koristi željezo(III)-hlorid ($FeCl_3$), za pH neutralizaciju se koristi lužina natrijev- hidroksid ($NaOH$) a kao fl okulant se koristi vodena otopina polielektrolita. U DAF jedinici na površini nastaje plivajući mulj koji se konstantno odstranjuje u spremnik za mulj. Pročišćena otpadna voda odlazi u izlaznu razdjelnu komoru, odakle jedan dio vode (0 – 30%) odlazi u biološki pročištač sa slobodno plivajućim nosačima biomase (eng. MBBR - "Moving Bed biofilm Reactor") a ostatak pročišćene vode odlazi preko mjerača protoka u zadnje kontrolno okno i dalje u gradski kanalizacioni sistem. U biološkom pročištaču sa plivajućim nosačima biomase vrši se biološko pročišćavanje otpadne vode pomoću aktivnog mulja tj. biofilma mikroorganizama, koji se nalaze na nosačima biomase. Nosači su izrađeni od polipropilena, imaju specifičnu površinu od 3000 m²/m³. Kako se koriste aerobni mikroorganizmi potrebno je vršiti upuhivanje zraka, tj. aeraciju u biološkom reaktoru. U tu svrhu se koristi sistem za aeraciju sa srednje velikim mjehurićima zraka, koje snadbijeva puhalo koje se nalazi u strojnici. Smjesa biološki pročišćene otpadne vode i viška aktivnog mulja odlazi preko preljeva u spremnik za egalizaciju. Višak aktivnog mulja se pomoću uređaja za fl otaciju izdvaja u spremnik za mulj, a biološki pročišćena otpadna voda vrši razblaživanje neobrađene tehnološke otpadne vode i njenu istovremenu pH neutralizaciju. Mulj sa fl otacije kao i višak aktivnog mulja odlaze u spremnik za mulj, gdje se prikupljaju do trenutka dehidracije. Strojna dehidracija mulja obavlja se pomoću tračne fi lter prese uz dodatak vodene otopine polielektrolita. Kao rezultat dobije se dehidrirani mulj sa udjelom suhe tvari od 18 -25 %, koji se dalje zbrinjava u skladu sa lokalnim zakonom. Procijeđena voda se vraća na početak tretmana u spremnik za egalizaciju. Prednost ovog načina tretmana otpadnih voda je u tome što nije potreban sekundarni taložnik, nema pumpe viška mulja, na uređaju za fl otaciju dobije se mulj konc. 6-8 % a samim time se stvara i manja količina mulja, te se vrši pH neutralizacija neobrađene otpadne vode sa biološki pročišćenom otpadnom vodom koja je pH neutralna.

ZAKLJUČAK

Nakon puštanja uređaja u rad i perioda probnog rada od 30 dana izvršena je analiza pročišćene otpadne vode. Dobivene vrijednosti parametara zadovoljavaju sve tražene izlazne parametre i date su u tablici 3.

PARAMETAR	VRIJEDNOST	JEDINICA
pH vrijednost	7,22	-
HPK	462	mgO ₂ /l
BPK5	237	mgO ₂ /l
Ukupne suspendovane materije	36,5	mg/l



Novosti iz firmi članica Komore...

OBILJEŽAVANJE 20 GODINA “MI-BOSPO



Mikrokreditna fondacija MI-BOSPO, prva mikrokreditna organizacija u Bosni i Hercegovini, ove godine obilježava 20 godina uspješnog poslovanja na polju pružanja finansijskih usluga prvenstveno ženama poduzetnicama. Prvi mikrokredit je plasiran u toku 1996. godine kao dio pilot projekta Svjetske banke (World Bank), a na dan 11. mart MI-BOSPO će obilježiti 20 godina predanog i odgovornog finansiranja poduzetničkih aktivnosti ponajprije žena u BiH. Do danas je MI-BOSPO radio sa 87.670 klijenat(ica) a tj. sa 75.170 žena (86%). Isplaćeno je blizu 269.000 kredita ukupnog iznosa cca 577 miliona KM, a prosječni plasirani kredit iznosi svega 2.400 KM. MI-BOSPO je tokom svog produktivnog rada akumulirao značajna finansijska sredstva, koja obezbjeđuju dalji rast i poslovanje, te stekao povjerenje komercijalnih banaka i različitih međunarodnih finansijskih fondova. Nakon 20 godina stabilnog poslovanja nastavlja provoditi korake koji će osnaživati poduzetništvo i jačati BH ekonomiju, a preko mreže od 25 ureda i 154 zaposlene osobe. MI-BOSPO analize govore da je 72% ukupnih kredita uloženo u razvoj poslovnih aktivnosti, a čiji su prihodi pozitivno uticali na kvalitet života korisnic/ka kredita ali je i tokom 20 godina zapošljavao više od 300 osoba, što je (bio) prihod za, prosječno, 9.000 članova njihovih porodica. Davne 1996. godine za stanovnike BiH mikrokreditiranje je bio bolji odgovor na njihove potrebe nego je, tada još uvijek prisutna, humanitarna pomoć. MI-BOSPO je kreditima tadašnjim korisnicama psihosocijalne podrške ponudio mogućnost pristupa kreditima dugoročno, uz ugovaranje obostranih prava i obaveza. Ovaj kredit je svrsishodno korišten i uticao je na jačanje finansijske, imovne i poduzetničke snage žene i porodice. Godinama poslije, ipak, smatralo se da je osim finansijskih neophodno ponuditi i nefinansijske usluge, te je tako 2010. godine formirana i Mreža žena u biznisu koja je okupila blizu 2.000 članica, a aktivna je i danas. Najbolje prakse poslovanja MI-BOSPO je učio od mnogih, podrška za dobar rad nije izostala, a ni članstvo pri globalnoj mreži Žensko svjetsko bankarstvo (Women's World Banking) koja broji 38 finansijskih institucija iz 27 zemalja, dok je MI-BOSPO jedina članica sa evropskog tla. Potvrda kvalitetnog rada i odgovornog zaduživanja prisutna je i kroz SMART certifikat o zaštiti korisnic/ka finansijskih usluga. Aktivnosti koje će MI-BOSPO provoditi tokom 2016. godine usmjerene su na promociju uspješnih biznisa klijentica, podržavajući ih jednako kao i tokom proteklih 20 godina, ali i s namjerom ohrabriranja svih potencijalnih poduzetnica/ka da krenu putem kreiranja vlastitih radnih mjesta, uz finansijsku podršku koju će im MI-BOSPO pružati i u narednom periodu.

TUZLANSKI “MENPROM” IZVOZI U MARTU 2.000 TONA GOVEDINE ZA TURSKU



Mesna industrija “Menprom” iz Tuzle u martu planira dogovoreni izvoz od 2.000 tona svježeg govedeg mesa za Tursku. Kako bi mogao ispoštovati ugovor, “Menprom” je već počeo pregovore sa malim stočarima iz svih 12 općina Tuzlanskog kantona, od kojih bi kupovao svježe goveđe meso.

Za skladištenje otkupljenog mesa i proizvodnju mesnih proizvoda već je u toku izgradnja novog proizvodnog pogona od 4.000 kvadratnih metara. Tokom nedavno održane promocije projekta izvoza mesa u Tursku predstavljena je i mogućnost kreditiranja proizvođača investicionim kreditima u iznosu od 50.000 eura. Krediti su osigurani preko Turkish Ziraat Banke i namijenjeni su fizičkim licima za kupovinu zemljišta sa povoljnim uvjetima, uz grejs period od 24 mjeseca. Kreditnu liniju finansira Vlada Republike Turske.

D.K.



Sajmovi u 2016. godini...

**SARAJEVO: SAJAM INTERIO &
EXTERIO 2016 OD 16. DO 20.3.**



Vanjskotrgovinska komora Bosne i Hercegovine obavještava da će se u Sarajevu od 16. do 20. marta 2016. godine, u organizaciji Centra Skenderija – Sarajevskog Sajma, održati 34. međunarodni sajam šumarstva, drveta, namještaja i unutrašnjeg uređenja – INTERIO i 3. međunarodni sajam pejzažne arhitekture i hortikulture – EXTERIO. Više informacija i prijava učešća u prilogu i na www.skenderija.ba.

**LUKAVAC: SAJAM "LIST" OD 12. DO
14. MAJA 2016. GODINE**



Slijedeći potrebu za objedinjavanjem turističke ponude Bosne i Hercegovine, te za snažnijom i kvalitetnijom promocijom ove perspektivne privredne grane, u Lukavcu se 14. godinu za redom održava sajam turizma „LIST“. Manifestacija koja je već prevazišla lokalne i regionalne okvire će se slijedeće godine održati u terminu od 12.do 14. maja 2016. god. Prethodne godine na Sajmu turizma svoju ponudu predstavilo je 125. izlagača, a broj posjetilaca premašio je 15. hiljada. Doprinoseći ekonomskom razvoju BiH uz podršku organa vlasti, mi želimo dobrodošlicu svakom potencijalnom reprezentativnom gostu ili učesniku sajma iz Evrope i svijeta. Želja nam je da ponudimo i predstavimo najatraktivnije svjetske turističke resurse domaćim turistima a privrednicima iz BiH omogućimo lansiranje na svjetsko tržište. U isto vrijeme sajam je naša prilika da pokažemo Europi i širem okruženju, prirodnu ljepotu BiH i turističkih odredišta u našoj zemlji. Kvalitetu manifestacije će doprinijeti bogat, sadržajan i raznovrstan program. Prijavni materijal na www.kpktz.ba.

**MOSTAR: 19. MEĐUNARODNI SAJAM
GOSPODARSTVA
OD 12. DO 16.4.**



Privredna/Gospodarska Komora Federacije BiH poziva sve privredne/gospodarske subjekte BiH da se predstave na 19.međunarodnom sajmu gospodarstva MOSTAR 2016. Sajam se održava u Mostaru od 12.-16.4.2016. g. Ova sajamska manifestacija najveći je privredni/gospodarski događaj u Bosni i Hercegovini i Regiji te samim tim i jedinstvena prilika za kvalitetan nastup i prezentaciju Vaše kompaniju potencijalnim domaćim i inozemnim korisnicima. Svi privredni/gospodarski subjekti zainteresirani za nastup na Mostarskom sajmu mogu se obratiti P/G Komore FBiH: Kontakt osoba: Dario Planinić,dipl.oec, privredna/Gospodarska Komora FBiH - Ured Mostar - Mail: d.planinic@kfbih.com - Mob: 063 481 600 Ili direktno upravi Sajma: Tel: 036 350 080, 036 350 194 Mail: info@mostarski-sajam.com Više informacija na : www.mostarski-sajam.com

**TUZLA: SAJAM "ENERGA" U TUZLI
OD 7. DO 9 JUNA**



Čini nam posebno zadovoljstvo pozvati Vas na sudjelovanje na Međunarodnom sajmu energetike ENERGA u Tuzli 7 -9. juna/lipnja 2016. godine. U proteklim godinama program ENERGA potvrdio se kao uspješan i atraktivan poslovni događaj te se svrstao među najznačajnije manifestacije u oblasti energetike u Regiji. Sajam ENERGA je mjesto susreta uglednih domaćih i inostranih kompanija i institucija koje svoja raznovrsna istraživačka i proizvodna ostvarenja, trendove i dostignuća moderne energetike te različite oblike poslovne saradnje, prezentiraju u stručnoj-relevantnoj javnosti. Organizacija Sajma omogućava izlagačima da u okviru poslovnih susreta B2B ostvare direktan kontakt i upoznavanje s potencijalnim poslovnim partnerima. Interes i struktura poslovne i stručne javnosti za sudjelovanjem, potvrđuju stečeni ugled i poziciju programa ENERGA. Srdačno Vas pozdravljamo i radujemo se Vašem sudjelovanju na Sajmu u Tuzli. Program i prijava na www.tuzlanskisajam.ba.

D.K.



KANTONALNA PRIVREDNA KOMORA TUZLA
THE CHAMBER OF ECONOMY OF TUZLA KANTON
KANTONALE WIRTSCHAFTSKAMMER TUZLA

WWW.KPKTZ.BA

BUDITE I VI ČLAN



0 KOMORI

PRIVREDA TK

REGISTAR

VŠE



PRVA POSJETA MANDATARA GUTIČA KOMORI
Konzultacije sa privrednicima

WWW.KPKTZ.BA

**BUDUĆI PREMIJER SA
PRIVREDNICIMA**



Zvanična posjeta Kantonalcij

**PAVE – PRICON WATER &
ENERGY™**



Prezentacija u Kanjor, 23.



TREĆI JAVNI POZIV



Javni poziv za kandidovanje
Programa uložaka preostalih
ciljeva energetske strategije

WWW.KPKTZ.BA



VJESITI

NAJAVE POZIV



Budući premijer sa
privrednicima
05.03.2015.



Usvojen Poslovni plan
2015. – 2019.
25.01.2015.



Inovni i Ekoinovacioni
iskollet
25.01.2015.

Positivan primjer

25.01.2015.



Pripreme za 6. SBF
25.01.2015.

TUZLANSKI

WWW.KPKTZ.BA